

Couste teste da gridlin,
 Pofarbaco e spadassin
 A m' guardran
 Pa pi ch' un can,
 Quand i ciama pr la strà
 La ca ca carità.
 D' vote i stagh dij dontrè di
 Con quaich mica d' pan mufi;
 Maginè
 Che bel stantè!
 E pur j' eu bel tni sospirà,
 J' è pi nen d' ca ca carità.
 Veule un poch ch' i dia mi
 Le personne ch' a dan pi?
 Son la gent
 Ch' a l' an dij stent,
 E pi prest necessità,
 Coui ch' a fan d' ca ca carità.
 L' è peui lo ch' an tante cà
 A j' ariva d' stravacà,
 E san nen
 Da doya a ven;
 L' è ch' a son inimicà
 Con la ca ca carità.

Una Monaca malcontenta.

CANZONE XLIII.

Che sproposit, che folia
 J' eu mai fait, mi povra fia!
 Son propi staita spensierà
 A lasseme dè la spinta
 Pr doveje mnè si drinta
 Una vita disperà!

I son fame personera,
 E liame d' che manera
 Pr le gambe, col e bras;
 Son an mes a quatr muraje,
 Tra 'l martel, ancuso e tnaje
 Condanà a mastiè 'l cadnas.

Ant 'l feme monigheta

Mi pensava d' vive chieta,
 Senza crussi e senza guai;
 Ma i m' treuvo con ste bisoche
 Tut 'l di a sonè le cioche
 Contra 'l tron e i temporai.

J' eu da fè con ste volpasse,
 Ch' a son bonne marcacasse,
 A san bin giughè a picat;
 Ogni pcita bagatela
 Venta ampò senti eclatela,
 Tute desgagià d' filat.

Squasi tute m' an pià d' mira,
 Una m' poussa, l' altra m' tira,
 E mi i son la balotà;
 Ai na veul dla soferensa,
 Dla politica e passiensa
 Con ste teste fagotà.

Coul digiun e dissiplinna

Con coul coro m' assassinna;
 Pur j' è gnunne remission,
 Fin a tant ch' la pel a dura
 Venta steje a la tortura,
 E pensè a tirè 'l cordon.

Ma s' j' aveis an tanta urgensa

Quaich persona d' confidensa
 Da sgontieme ampò 'l gavas,
 A m' è vis, ch' an quaich manera
 I trovria un pò pi lingera
 Cousta cros, ch' a m' stropia i bras.

Bin che 'l parlatori ai sia,
 A sgonfiesse l'è folia,
 Dont a j'è le ascotatris,
 Ch'a stan li a servive messa,
 E peui a van da la Badessa
 A contè tut lo ch'un dis.
 S'un veul scrive dontrè righe
 A quaicun, l'è piasse d'brighe,
 Prchè a veulo lese tut;
 Son curiose tute quante,
 Sul pretest d'fè le zelante,
 Ma l'è pr gavè 'l costrut.
 J'è nissun da gnunne bande
 Pr scotè le nostre lande,
 Riservand 'l Confessor;
 Ma an diverse congiunture
 L'ha dco chial a piè d'misure
 Bel e bin con cousti umor.
 Le fassion a san dco feje
 Tant le giovò com' le veje
 Quand a porta l'ocasion;
 Si ch'anlora van trovesse
 Tra lor aitre pr ciusiesse,
 E fè i toiro da scondion.
 Son propi staita una tabussa!
 A saria mei ch'i m'fussa
 Maridà con quaich faseul;
 A peul desse ancor ch'j'avria
 Quaich piasì, quaich alegria;
 Ma ansisi j'è sempre 'l deul.